

9.7. 462.







JO. EBERHARDI RAU

S. THEOL. PROF. P.

E X A M E N
JURIS CANONICI
ET PRAXIS FORI
ECCLESIASTICI

PROTESTANTIUM
IN CAUSA RAPTUS
ET AFFINIBUS.



ARNHEMIÆ,

Ex Officina NEBEANA, 1753.



AUCTOR LECTORI SUO
S. D.

Bene animadversum est his, qui de republica constituenda & bonis legibus munienda commentati sunt, inter hominem ejusque actiones & civilem societatem intercedere simulacrum quoddam & imaginem. Namque (ut omittam cetera) quemadmodum mali habitus, longo usu contracti, hominem deturpant atque decoro statu dejiciunt; ita vero in republica malæ consuetudines bonis moribus omnique politiæ noxam adferunt, tanto graviores, quanto securius in nervum erumpunt & longo tempore justī velut tituli possessionis acquirunt privilegium. Qua re fit, ut eamus qua itur; non qua eundum; vulgo ex veritate pauca, ex opinione multa æstimante. Est autem consuetudo omnis, ni solida ratione armetur quidam morum tyrannus, Hercommannus ille: cui pro satellitio sum anticipatæ opiniones & pravi affectus. Illæ

in foro iudices, quales; hi privatos occupant. Furiarum biga: veri inquirendi sufflamen: pestis optimarum rerum. Utrorumque cum multa in communi vita sunt incommoda, strages multæ; tum vero ea est longe maxima, quod velut olim in factionem Catilinaream M. Percius Cato gravissime diserebat, paulatim *vera rerum vocabula amittimus*; quam verbi gratia *bona aliena largiri, liberalitas: malorum rerum audacia, fortitudo*; adde, quum injusta, & in fraudem legis contracta Sponsalia mollissime atque ex more seculi stratagema Venereum, tanquam excellentis & res ingenii, nec vulgaris artis, appellantur. Nimirum habet indomitus ager quasdam herbas lætiores: & humani ex corporis sagina nævi ac luxurians caro magis extuberat; ut nisi ea amputata atque in ordinem redacta, sanum nihil, cruda, contorta & obstipa sint omnia.

Vetat hujus loci angustia longum pertexere malorum catalogum, quæ illa

illa ex lerna in hominum societatem, mores, verique & falsi scientiam undique diffunduntur: diffusa boni omnes dolent. Sic mecum reputans, in animum induxi meum, utraque cum bellua, puta anticipato suffragio & affectum pravitate, in campo juris sacri, quod versatur circa violenta connubia, hac quidem opera congregi, eamque si non confodere, at sic atterere minimum, ut exagitata quassataque armis legitimis, minus ab ea detrimenti ac dedecoris sanctior res Christiana capiat. Et vero sapiens Aurelii Victoris sententia est, quæ vita Constantini Cæsaris velut gemma internitet: *In optimis reipublicæ moribus, quamvis parva vitia, elucent magis: eoque notantur facile: quin etiam acrius sæpe officiunt; cum ob auctorum decus in virtutes potissimum accipiuntur, atque ad imitandum invitamento sunt.* Et Juvenalis Sat. VIII. 140.

*Omne animi vitium tanto conspectius in se
Crimen habet, quanto major, qui peccat, habetur.*

Hic finis, haec meta consilii est. Quare sicubi dictum quid durius videatur; id vero nisi eo aurigetur, dictum nolim. Ut sine fugillatione aut morfu pugna hæc sit; sicut decet mitium Deorum alumnos. Quanquam non eam mihi Rhadamanteam legem dico, ut fraudi sim libertati, quæ verum in rebus a falso discernenti neganda est nemini. Scapham scapham dicimus, ligonem ligonem. Nam qui mores seculi perstringunt, gentium consensu medicorum aliquod instar habeant oportet, ut fecent, urant, versa in speciem crudelitatis clementia, cum desperatur, de salute. Vale!

INNOCENTIUS Pontifex Extravag. cap. 3. de Raptoribus & Incendiariis decernit: *Si puella invita rapta fuerit & postea consentiat matrimonio raptoris, nuptiæ contractæ sunt etiam invitæ parentibus.* Addit, hoc fieri *in honorem matrimonii.*

BOEHMERUS Jur Eccl. Protest. ad Decret. lib. I. tit. 2, de Constitutionibus

p. m.

p. m. 142. *Decisiones Juris Canonici ex veris suis rationibus examinandæ & cum statu Ecclesiarum nostrarum conferendæ, ita ut si diversitas nulla singularis appareat, in iis acquiescere liceat, in subsidium scilicet; ubi vero ex principiis fluunt a nostratibus vel rejectis vel cum statu ecclesiarum nostrarum pugnantibus, ab earum applicatione tamdiu desistamus, donec evidenter de observantia fori satis radicata constet. Conveniens est enim, ut dum principiis repudium misimus, conclusiones quoque eo ipso repudiatas esse in dubio judicemus. Et paucis interjectis: Plerumque provocatur ad Carpzovii Jurisprudentiam Ecclesiasticam, quæ tamen tantum praxin Saxoniam ostendit, & quidem illius temporis, quo vixit Carpzovius. Mutato Pæside judiciorum mutantur ut plurimum sententiæ: ut ita quoque nec observantia & ne quidem praxis hodierna Consistoriorum Saxoniarum cum scitis Carpzovianis conveniat. Hac via media qui inceserit, meo judicio tutissimus ibit.*



EXAMEN JURIS CANONICI
ET PRAXIS FORI ECCLESIASTICI
PROTESTANTIUM IN CAUSA
RAPTUS ET AFFINIBUS.

CAPUT PRIMUM.
STATUS CONTROVERSIAE
EJUSQUE DISCEPTANDAE PRIN-
CIPIMUM EXPONITUR.

ARGUMENTUM.

*Summa historiae Juris Sacri Protestan-
tium, & instituti ratio. II. Rap-
tus notio universim spectata. III.
Quid Jure Canonico. IV. Plenior
definitio. V. Quæ illustratur & con-
firmatur. VI. Status quæstionis,
VII. Ejus dirimendæ principium du-
plex.*

Omnes divinæ humanæque scien-
tiæ & artes ad commune fa-
tum habent, ut non simul &
semel

IN CAUSA RAPTUS. CAP. I. 9

semel unius atque alterius vel pertinacissima opera & studio ad aliquod perfectionis culmen evectæ sint: quod nec fieri posse humanarum rerum patitur conditio. Ita vero nec mirum cuiquam videatur, si id ipsum illi prudentiæ parti acciderit, quæ versatur circa Jus Ecclesiasticum in scholis Germanorum Protestantium. Quantum enim in eo momenti situm sit, ut subruto tractoque in præceps vetere ædificio, novum a fundamentis excitetur, nemo ignorare potest, qui vel hilum communi sensu polleat. In structura quavis præ materiæ infirmitate collabascēte hoc usu venit, ut quidem rimæ hiatusque facile in oculos incurrant ad spectantium, idque vitium a fundamentis infelicitè jactis redundare in universam molem recto judicio colligas (nam, sicuti ex vero canunt in scholis obscurorum virorum.

Male fundati male firma est fabrica tecti) qua tamen e materia, quo in loco, novum tibicinem admoveas, qui ruinam

10 EXAMEN JURIS CANONICI,
excipiat reprimatve, sæpe vix divinan-
do adsequare. Usque adeo, ut disjici
veterem compagem novumque ædifi-
cium secundum artis regulas ex integro
suscitari ipsa flagitet necessitas. Quo
digitum intendam hoc in limine, Le-
ctor polite, haud difficulter, me non
monente, intelligas. Sub initia Re-
formationis, quando una cum bonis
litteris sacrarum Scripturarum & Eccle-
siasticæ Historiæ, necnon tandem &
Juris Naturalis studium certatim coli ac
perpoliri a præstantibus ingeniis coep-
tum est (ut sunt res humanæ deoremento
atque incremento obnoxie) diu multum-
que conflictatæ sunt Protestantium
Academiæ cum Jure Pontificio Roma-
nensi, quod Canonicum a Conciliorum,
unde magnam partem compilatum est,
Canonibus audit. Neque solum e ca-
thedra tum docebant Juris Antecessores
aliquamdiu; sed graviore cum Ecclesiæ
ac Reipublicæ jactura in Principum
quoque vigeat Consistoriis: quotquot
exercitium juris circa sacra, vete-
ris

IN CAUSA RAPTUS. CAP. I. II

ris Ecclesiae exemplo cum Principatu conjunctum, pacto sibi asserum iverant. Donec ad extremum, & fero satis, horum decreta ad genuina, quoad ejus tum fieri poterat, principia revocata, nec non responsa juris prudentum, in dubio edita, corrigerentur atque in unum volumen & corpus redacta publici juris fierent. Quod cum laudatissimo instituto inter primos praestitisset Carpzovius, Lipsiensis; factum est, ut illa collectio Juris Ecclesiastici, ad ecclesias Saxonicas exacti, tanquam norma & regula decisionum in foro Protestantium aliorum, non Principum pactis decretisve, sed usu & consuetudine reciperetur. Verum enim, ne sic quidem rem satis in solido esse, ut ne dehisceret hinc inde nova illa juris compaginatio, multaque in eo desiderarentur passim, testes sunt qui Carpzovianas Definitiones ad incudem revocarunt, Brunnemannus Thomasius, Bochmerus, alii: strenui juris sacri reformati Assertores. Necdum tamen horum,

12 EXAMEN JURIS CANONICI

horum, cedro licet dignissima, opera effectum est, ut tota apte cohaereret, nusquam deformis, contignatio. Namque (ut nihil dicam de his, quae excommunicatis illorum ac Theologorum principiis, circa nonnullos ritus communium majorum vitio e schola Pontificia incaute traductis, eliciunt confectaria) non pauca, nec levia restant, si quid video, quae, etiamsi concessis utrinque Augustinae Confessionis focii in iis utantur principiis, tamen sinistre hinc deducuntur: atque etiamdum praeter divini naturaeque sanctissimi juris cynosuram constanti usu in foro recipiuntur. Id quod uno *Raptus* exemplo comprobare nunc quidem est animus: eoque magis, quod longius titulo praxis ferme radicata censeatur Imperio, ut per Jus Canonicum *raptori concedatur matrimonium cum rapta*: in eaque praxi, velut Sibyllino folio, acquiescatur: neque recte, an secus habeat, quod satis est, e divini juris visceribus disputetur. Vid. Carpzovius Defin. 75. n. 68. Brun-

neman-

IN CAUSA RAPTUS. CAP. I. 13
nemannus lib. II. cap. 18. §. 32.

II. *Rapiendi* verbum, cum de homine usurpatur, Latinis dicit *aviditatem celeritatem & violentiam*. Illas in subjecto agente; hanc in patiente: ut loquuntur Logicorum filii. Saepe etiam unam duntaxat harum notationum involutam habet; aliquando plures. Donati tamen nimia subtilitas est in Terent. Adelph. Act. III. Scen. 3. *Raptio*, inquit, *ad Personam refertur; rapina ad rem: raptus ad Stuprum, si proprie volumus loqui*. Est enim raptio eadem Terentio L. C. qui raptus, utiturque voce illa pro hac tantum metri causa: quomodo Aufonius in prim. Iliad. Homëri dixit *raptionem Helenæ*. Et personae raptio, extra quam ad infamem voluptatem, Latinis proprio est *plagium*. Hoc in negotio, ubi de muliere fermo est, quae libidinis ergo abducitur, dicit auferendi potiundi-que aviditatem, conjunctam cum *festinatione & vi*; sic tamen, ut haec magis spectetur, quam illa, atque adeo prima-

14 EXAMEN JURIS CANONICI

ma & praecipua verbi notio involvat *violentiam*. Ita passim Latini auctores unum violentiae significatum rapiendi verbo subjiciunt. Sic *raptō vivit*, qui vi atque injuria partis gaudet. Hinc festinatio & aviditas seorsim exprimitur. Florus Lib. III. cap. 20. *Nihil tale expectantis ducis subito impetu castra rapuere*. Et Lucianus in *Nexu* conjunxit *Deorum adulteria & violentias cum raptibus*. Eoque sensu potissimum de muliere ad voluptatem abutenda accipitur. Horatius I. Sat. 3. 109.

*Quos Venerem in certam rapientes
more ferarum*

Viribus editior cædebat.

Id circo verbum Ictis peculiariter ad illicitas & violentas nuptias translatum est.

III. Canonistis, praeunte Gratiano C. 36. q. 1. Cap. 2. *rapere* nihil aliud est, quam *violenter abducere puellam a domo patris, ut corrupta in uxorem habeatur: sive puellæ solummodo, sive parentibus tantum, sive utrisque vis illata*

IN CAUSA RAPTI. CAP. I. *Is
lata constiterit.* Qua quidem in defi-
nitione, quamvis verba calumniari fri-
volum putemus, neque adeo puellam
a domo patris abducendam sic exaudi-
amus, ut non simul quomodo libet.
blanditiis & dolis, quos notat Justini-
anus I. un. Cod. de Raptu virginum,
quovis e loco, five patri five tutoribus
aut familiae eripiatur; tamen hoc alie-
num videtur, quod addit Gratianus,
ut eam corruptam habeat *uxorem*. Po-
test enim raptor eam habere concubi-
nae loco, eaque abuti ad voluptatem;
quamvis non ducat uxorem. Deinde
Jure Civili pariter atque Canonico rap-
tus censetur, tametsi *corruptela* aut
stuprum non intervenit. Quo casu rap-
tor censurae subest Ecclesiasticae, at-
que etiam rapta, si in matrimonium
consentiat. Denique allata definitio so-
las nominat *puellas*; cum tamen &
nuptae & viduae & libertinae & ancillae
nec non & pueri aliquando rapiantur.
Ceterum recte Gratianus (in quo uti-
nam vestigia veterum presse tenerent
mustei

16 EXAMEN JURIS CANONICI
mustei Canonistae!) ad legitimas nuptias
tanquam conditionem necessariam re-
quirat parentum consensum. Raptus
enim etiam tum admittitur, quum con-
sentiens puella parentibus insciis & in-
vitis subducitur. Eaque in re lex ci-
vilis amice conspirat.

IV. Quam ergo id crimen multo pa-
teat latius; Raptum recte dixeris, &
in genere quidem: *Cum quis hominem,*
speciatim mulierem ingenuam & hone-
stam, sive coelibem sive conjugatam,
volentem, sed invitis parentibus aut ma-
rito, cujus uxor est, aut nolenter ab-
ducit ut sit in ejus potestate: sive eam
ducat uxorem, sive ea abutatur ad vo-
luptatem. Est vero Raptus quaedam
species: *Ubi quis mulierem, quam dixi-*
mus, ingenuam, in fraudem legis, ad
emolliendam delicti atrocitatem atque
invidiam, sive ipse sive per alios, blan-
ditiis & dolis artibusve, ab honestate ac
juris specie remotis, hoc efficit clanculum
cum hostilitate quadam & injuria pa-
rentum, quod alii per apertam *sim:*
sigi-

virginemque ita expugnat, ut initis secum clandestinis sponſalibus ſuos in amplexus ruat, & venia copulationis ſacerdotalis in iudicio Eccleſiaſtico impetrata, ſpe amplæ dotis, ejus uxor ſit; ſive ſtuprum interveniat, ſeu non. Ita-que ad rationem formalem culpæ requiritur, illic quidem vis publica; hic privata & clancularia. Quanquam & hæc in eventu, ratione parentum, quorum poteſtas eluditur (Neque enim ea eſt liberorum procreandorum conditio) etiam publica dicenda eſt. Sic tamen, ut *gravioris* poenæ reus ſit, qui aliquam per vim publicam atque in omnium oculos & odium incurrentem rapuerit; *graviffimæ*, qui ſimul ſupra-
verit: *mitius* autem habendus ſit, a poenæ civili arbitrariæ cenſuræque Eccleſiaſticæ ſubefſe cum muliere & facti fociis cenſeri debeat, qui eam, præſertim minorennem, blanditiis & dolis pellexerit, ut in vitis parentibus, aut qui illorum loco ſunt, ſeſe abduci patiatur. Quanquam ex vetere Impe-

18 EXAMEN JURIS CANONICI

rii observantia in foro civili raptor capitis supplicium subiit, atque insuper bona amisit, siue mulier velit siue nolit; per l. un. C. de Raptu virginum & l. Juliam de vi publica. Illic vis infertur libertati puellae ac parentibus, aut marito; istic praeterea pudicitiae: hic solis parentibus: ubique vero etiam cognatis ac familiae. Unde illud docendi causa violentum conjugium *dupliciter*, istud *tripliciter*, hoc *simpliciter* tale, aut mavis, hoc postremum paulo mollius *abductionem* appellare liceat. Est enim aliquid indulgendum seculo & novae Juris Philosophiae. Exempla e sacris Scripturis infra adferemus.

V. Quum vero in definitione raptus hunc casum, tanquam eadem plus minus haud vacantem culpa, expressimus. ubi quis videlicet in fraudem legis, directe ac mediate, per artes & machinationes ab honestate ac juris specie remons, hoc efficit, ut mulier ad raptum quasi manus porrigat; id genus
atten-

attentatum autem, secundum utriusque Romani Juris regulam, non veri nominis raptus judicetur: quippe ad cujus essentiam & rationem formalem requiratur, ut mulier *violenter* abducatur; eam nobis hoc loco impositam necessitatem cernimus, ut etiamsi res non geratur per vim publicam atque in omnium oculos & odium incurrentem, atque adeo is, quem diximus, casus raptus proprie & presse dictus videri nequeat; attamen, ut liberales simus, illius saltem speciem & gradum inferiorem, non mera clandestina sponsalia, censendum, poenamque adeo extraordinariam & arbitrariam in abductorem & socios, velut in raptu proprie dicto nunc obtinet, ut ut paulo leviolem, statuendam esse vincamus. Et principio quidem in genere animadvertendum est, actionis cujuslibet moralis vitiositatem in foro humano non tam ex modo agendi externoque apparatu (qui cum saepe minus sub adspcetum & publicam invidiam cadat, poenae non

facit locum) quam præsertim ex intentione, fine & effectu, nec non objecti, in quo terminatur, natura & imbecillitate metiendam esse. Quanquam itaque externus agendi modus hoc in casu differt ab eo, qui in raptu proprie dicto usu venit; idem tamen est machinationis & potiundæ Helenæ consilium; eventus idem: tum ratione patriæ potestatis, quæ hic contemnitur; tum Ecclesiæ, quæ offenditur; tum ipsius mulieris, quæ cum verbi gratia (finge casum) pars sit honestæ familiæ, & quidem minorennis, adeoque recte sibi prospicere per ætatem nequit, contra vero a parentibus *ad legitimas nuptias, non secus* (sic apud Livium suam & filiæ causam peroravit Virginus) eoque consilio & procreata & educata est, ut universæ familiæ communique stirpi profit ejusque honori ac incremento vivat & nubat; ab ea per vim avellitur, atque haud raro, ubi læsus parentum aut tutorum honor publice non reparatur, sibi relicta quasi mortua

tua cenfetur. Quin & ea res femina jacit longinqui odii, atque internecinas inter facti auctores complicesque & agnatos conflant fimultates & inimicitias. Ut dubites, utra fit peftis perniciofior, publicumne bellum, an privata familiarum difidia: quæ uti majorum focietatum fimulacra funt & imagines, ita glifcentes inter has lites ad gangrænæ inftar omni ævo lugubrem habuere exitum: nafcunturque hinc fæpe multa incommoda, quæ in ipfam rempl. maxime redundant. Id quod fufe perfecutus eft Plato lib. II. de Repl. Melius edoâta Plautina Alcumena, Amphitr. act. II. fcen. 2. 209.

*Non ego illam mihi dotem duco efſe,
quæ dos dicitur:*

Sed pudicitiam, & pudorem, & ſe-
datam cupidinem,

*Deum metum, parentum amorem,
& cognatum concordiam.*

Quid enim, obſecro, intereſt inter veri nominis raptum & illos, exempli gratia, ſuperiore ſeculo in nobili oppi-

22 EXAMEN JURIS CANONICI

do Saxoniae confarcinatas fraudes, in legis vituperium excogitatas confictasque: quando adductores atque adductrices, ut Apulejo audiunt, & in his qui honestatis, gravitatis, sanctimoniae & sacri ordinis larvam induunt, securius nemineque opinante in stratagema conspirant: quum illi, inquam, ne fraus & dolus perpluat, neu prius hinnula evadat, erumpat, quam casibus constricta tenetur, non solum privatos inter parietes, quo officii & humanitatis ergo convenimus, sed & parili praetextu ruri inter hortorum camporumque latebras, virginem (cujus quidem pudicitiam, ut ille in Plauti comoedia senecio, quisquam non nimis servare potest) pelliciunt, suumque Paridem, ceu mercem peregrinam & nudius tertius advectam pulchre, ut fit, exponunt, commendant: tum vero instrumentum sponsalitium ex arena puellae obtrudunt, addito hoc mandato, ut ne rem agnatis prodat antequam ad procum avolet, quo parentur nuptiae: solici-

solicitatu-ros se interea temporis tuto-
res absentes, ut consensum interpo-
nant; sin illi negent, salvam rem fore
in Consistorio? Isque adeo de compacto
ludus editur, ut non tam personam
ambiant, quam ejus dotem fortunas-
que in procum transferant. Dices hic
intervenire consensum virginis. At,
quidni is vi clam & precario extortus
atque adeo nullus dici debet, ubi puel-
la, & quidem minorennis, vixdum
pubes facta, sub expressa conditione,
nisi tutores dissentiant, sponsalia qui-
dem contrahit, postmodum tamen
proxenetarum artibus eo adducitur, ut
conditione posthabita ipso facto nubat
proco; licet tutores dissensum suum
solenniter in judicio declaraverint?
Unde resultat quaestio, Num rescindi
sponsalia, dolo malo inita, possint ac de-
beant? quod nemo non negat. -Rur-
sus, fac consensum puellae accessisse
atque etiam tutorum; tamen Jure Ci-
vili poenae raptus manet locus quoad
bona rectoris & raptæ; licet hæc & illi

24 EXAMEN JURIS CANONICI

in matrimonium consentiant. Erit ergo & hic poenæ civili locus cum in abductam statuendæ, tum in abductorem & complices; quamvis cum aliquo temperamento, ut mox dicemus: nec solum civili, verum & Ecclesiasticæ; quia Ecclesiæ præbetur scandalum. Estque omnino attendenda huc quadrans legis ratio, quam Justinianus subjecit l. cit. *Quoniam*, inquit, *in Republica nostra non patimur, ut quis hostili more uxorem ducat. Cives enim ducere solent uxores, non rapere. Quod si puella sponte velit rapi, nihil tamen, pergit Imperator, de pœna raptoris minui debet: omnino eadem est, siue mulier velit siue nolit.* Iterum rationem subdit; *Quia si raptor sibi temperet a raptu: non est verosimile aliquam mulierem se ultro rapiendam oblaturam; idcirco probabile videtur eam blanditiis & dolis expugnatam esse.* Neque vero pacis opus; sed ut C. Cæsar apud Sallustium, *belli sævitia est, rapi virgines, pueros; divelli liberos a parentum*
com-

complexu. Ita vero plane existimo : quemadmodum quis homicidii tenetur, siue palam & per vim, adhibito lethali instrumento, clava, gladio, hominem interimat, siue id clam faciat & per insidias, potione venenata aliisque pharmacis: quantovis volenti atque infanienti propinentur; ita nihil interesse, utrum quis virginem per apertam vim, an hominum opera, quos multo saepe fricat Plautus Pers. Act. IV. Scen. 6. 20-23. his quibus ante dictum, turpissimis machinis paterna e familia submoveat. Siquidem utrobique ex diverso actu idem eventus, effectus idem consequitur: illic vis publica, hic privata est & clancularia; proinde vis tamen, non sine bonorum omnium offendentulo. Itaque ex dictis sua sponte fluit conclusio: Nimirum, quia in altera parte abductoris consilium potiundæ Helenæ ab hostili more uxorem ducendi parum abest, blanditiisque & dolis adversus minorem res gesta est, eoque scandalum præbitum Ecclesiæ;

in altera vero tutorum consensus ex ordine, quamvis dicis causa, requisitus fuit; cessabit omnino quidem poena, quæ, Jure Civili, lege Julia de vi publica, ex vetere praxi raptori & complicibus infligebatur. Porro cessabit poena, quæ nostris moribus passim in raptum proprie dictum statuitur, quoad quantitatem. Cetera erunt paria, ratione qualitatis poenæ; five species *cenfuram Ecclesiasticam*, cui suo merito omnes subsint, abducta & abductor & focii; five speciatim consideres abductorem & complices, qui non quidem more majorum fustigatione, sed *poena civili extraordinaria* seu arbitraria teneantur; five puellæ consentientis *exheredationem* adspicias, qualis & in meris clandestinis sponsalibus obtinet, ubi iustas disentiendi causas parentes habent. Tales vero causæ licet hic allegari nequeant; cum tamen modus procedendi quam proxime ad raptum proprie dictum accedat; hic id genus causas supplere censendus est

est: ut adeo hæc non minor pars pœnæ sit, quum dote carendum est abductori, cui maxime inhiasset. Huc facit, quod si qua filia nopsisset invitis parentibus, aut alioqui se petulanter & impudice gessisset, parentibus jus sit eam exheredandi; ut in Cod. habetur de Inofficioso Testam. Hoc unum excipitur, si pater sciverit transisse justum tempus matrimonii, hoc est, XXV annos, & filiam noluerit elocare; tum nihil habet quod agat adversus filiam, si eo incio vel invito nupserit: imo cogitur illi dotem dare; ut est ibidem. Quæ cum ita sint; judicium Ecclesiasticum hoc in casu in præjudicium familiæ, aut quorum abducta in potestate fuit, concedere abductori matrimonium cum abducta tutorumque consensum, quasi ex officio, supplere potuisse, ita ut nulla in hos stringeretur censura, ne quidem publica deprecatoria, ut loquuntur, tutoribus debita, boni omnes negabunt, mirabuntur. Quin contra de vi facta

28 EXAMEN JURIS CANONICI

facta familiæ querelam interponendi in judicio Cameræ Imperialis tutoribus, aut ubi illi defint officio, proximis agnatis, jus salvum fuisse, extra controversiam positum sit apud hos qui norunt, quid distent æra lupinis.

VI. Sit igitur quæstio ad disputandum proposita: *An raptori & abductori juste concedatur matrimonium cum rapta & abducta?* Quod negamus, & contra asserimus, has quidem nuptias, ob circumstantias, quas modo attulimus, haud temere concedendas: illas vero etiam esse detestabiles. Siquidem ubi publica auctoritate permittuntur; atque ubi raptores aut abductores norunt habituros se raptas aut illectas in matrimonium; juvenum effreni licentiæ porta decumana aperitur: patria potestas proculcatur: funestæ sæpe inimicitiae conflantur: ingenuæ, nobiliores opibusque florentes familiæ pessudantur: supremi Numinis ira provocatur: summa miscentur imis, pessimorumque exemplorum seges ampla
in

in republica futura est.

VII. Quod ut demonstremus, pro norma & regula nobis sint, tum *Sacræ Scripturæ*, tum sobria *praxis veteris Christianæ Ecclesiæ*, Conciliorum melioris notæ canonibus, tanquam suffragiis, confirmatæ. Quo quidem principio, extra controversiæ aleam genuino, si recte ac legitime utamur; tum vero obtinuisse merito censebimur, quod est in quæstione positum.



CAPUT SECUNDUM.

DE EO, QUOD JUS MOSAICUM
STATUIT DE RAPTO & DELI-
CTIS AFFINIBUS.

ARGUMENTUM.

*Leges divinae, de plagio: tum de stu-
pro voluntario & violento. Error
Canonistarum, & Rabbinorum. II.
Num fas fuerit Israhelita militi per
legem Deut. XXI. 10-14. inferre
vim pudicitiae virginis bello captæ.
Negatur adversus Rabbinos & Sel-
denum. III. De Raptu nihil specia-
tim cautum est Jure Mosaico. Ju-
dici tamen normæ loco erant, præ-
ter legem plagii, sacrae Historiæ, qui-
bus ultimum supplicium ipse Deus
raptoribus statuerat.*

Ordiemur a Divino Jure, & qui-
dem Mosaico. Hoc etsi quoad
leges forenses, quatenus ad Judæorum
Rempublicam relationem habent, nos
non obligat; si tamen lex aliqua simul
in

in naturali jure & æquitate fundata sit, aut quid statuendum de crimine, Sacra haud obscure prodat Historia; utique & nobis sub Novo Testamento nostrarum legum normam esse & regulam censeretur debet. Et de Plagio quidem, hoc est, illo flagitio, quo siue sui siue alieni juris homo Israelita ab Israelita per vim aufertur & abducitur, ut vel vendat eum plagiarius, vel serviliter duriterque habeat, aut cogat ad militiam, quum sui vel alieni juris sit, diserta lex est Exod. XXI. 16. quæ repetitur Deut. XXIV. 7. ultimum supplicium sanciens in reum: addita ad delicti detestationem ratione illa, *ut malum, hoc est, res mali exempli, tollatur e populo. Si quis deprehensus fuerit furtim auferens aliquem hominem e fratribus suis Israelitis*, והתעמר בו & imperitaverit ei detrufurus ad servitia, aut vendiderit eum, omnino morietur fur ille: sic sustuleris malum e medio tuo. Neque aliter Hebræi hanc legem accipiunt; nisi quod genus supplicii

32 EXAMEN JURIS CANONICI

plicii definiant strangulationem; in Codice Sanhedrin cap. X. 1. Quamquam enim lex illa cum Hierosolymitano interprete de illicito & violento connubio exaudiri, aut vero etiam ad mulierem furto abripiendam extendi posse videatur (Et sunt in Gemara dicti codicis fol. 85. 2. quibus hoc posterius arripitur) attamen scrupulum judici Israëlítico haud abs re injecerit prior lex Exod. XXI. 16. ubi delictum ad *hominem marem* *וְאִישׁ*, & quidem similiter *vendendum* restringitur. Itaque adversus Raptum presse dictum, qui fiat de liberato consilio, & eo quidem animo, ut quis raptam uxorem habeat aut ea voluptatem expleat, nihil speciatim cautum est Jure Mosaico. Quod si enim puella Israelitica illecebris eo sese adduci atque expugnari pateretur, ut ituprum in se admitteret lubens ac volens; hoc in casu valebat lex Exod. XXII. 16. 17. *Si quis pellegerit virginem (ingenuam & honestam.* Neque enim illa corpus suum ultro prostituere præsu-

præsumitur) *non desponsam; & coiverit cum ea; constituat ei dotem ducatque uxorem. Sin renuat pater ejus eam dare illi; pecuniam pendito, prout est dos virginum.* A cujus legis posteriore membro quantum nostra nunc recedat praxis, norunt dolentque boni omnes, qui in foro versantur. Porro, edicta illa Deut. XXII. 22-29. hos sigillatim casus circumscribunt, ubi quis Veneris œstro percitus (דפן דער רב Rabbini dicerent; sive, ut Persius Sat. III. 36.

cum dira libido

Moverit in genium ferventi tincta veneno.)

vel uxorem alterius vel virginem desponsatam vel coelibem & innuptam vi compreserit: non eo consilio, ut eas habeat uxores, aut porro iis abutatur ad voluptatem; multo minus, ut earum dotem in se transferat. Unde qui cum virgine invitam rem habuisset eamque vi compresisset, illi poenæ loco injungitur, ut non solum

C

mul-

multam pecuniariam quinquaginta siclorum, sat gravem pro ratione illorum temporum (Vid. 2. Reg. XV. 20.) patri puellæ solvat; verum & jubetur eam vel invitus habere in matrimonio, nec posse dimittere per omnem vitam: dato ei libello repudii, quod aliis fas erat; commate 28. 29. *Si quis (fortuito) reperiat puellam virginem, quæ non est desponsata, &prehendens eam concubuerit cum ea, & manifesti fiant; dabit vir ille, qui concubuit cum ea, patri puellæ quinquaginta siclos argenteos, & esto illi uxor. Quod compressit eam, ne potest dimittere eam omnibus diebus suis. Estque adeo lex illa capienda de puella non melioris conditionis aut fortunæ, quam est compresor, sed deterioris, aut certe æqualis. Secus enim legis sanctio, qua vitiatam habeat uxorem & quidem ad dies vitæ, non erat pars pœnæ, sed legis violandæ fomes potius & incitamentum. Apparet vero ex dictis, primum quidem*

IN CAUSA RAPTUS. CAP. II. 35

dem, quam nullo argumento Doctores Juris Canonici, hoc loco raptum proprie dictum intelligi, poenamque adeo in eum statui existiment, quam nostris legibus moribusque sequamur; quum nemo non videat palam sermonem Legislatori esse tantum de stupro violento. Quod & perspexere Hebræi interpretes in h. l. præcuntibus Juris Judaici Pandectis in Codice Kethuvot cap. III. 4. Præteriri tamen non potest, eorundem Judæorum Magistros (ut solent sæpe alibi) verba magis quam sensum istius legis captare: præcipientes eandem quinquagenorum siclorum mulctam illi dictari etiam, qui vel regio natam sanguine per vim stuprasset; idque per eorum juris regulam: *Quicquid præstitutos habet ex ipsa lege terminos, æqualiter se habet ad universos*; quum tamen communis ratio, nedum Jus Mosaicum, e diverso haud obscure eorum honori consulat, qui alios vel publico munere vel nobilitate ante-

cellunt: adeoque istius regulæ limitationem suppeditet, vetans, *ne quis principi in populo maledicat*, Exod. XXII. 28. Erant ergo personæ sanctæ & inviolabiles. Quod privilegium suo modo etiam ad eorum pertinuit domesticos. Atqui his si fieret injuria, aut si stuprum offerretur filiæ familias; gravioremne pœnam constitutam in delinquentem censebimus, quam ubi id flagitium in quamlibet de plebe puellam admissum sit? Ac fuit id ipsum moratiorum gentium legibus sancitum, ne connubia plebejis essent cum nobilibus: tantum abest, ut sæviens in nobilioris mulieris pudicitiam non gravius puniretur.

II. Quo magis mirere, Seldenum illas Rabbiorum officias intactas relinquere, neque ut potuit ac debuit, eorum scita ad rectæ rationis & juris sobrii obrusam exigere; contra iterum iterumque τῷ Ἀυτοῖς ἴφα lectores obtundere, corvosque hiantes deludere, Uxor. Hebr. lib. I. cap. 16. Quo
&

& illud pertinet, quod legem Deut. XXI. 10-14. cum Magistris in hunc sensum arripiat, tanquam liceret Israelitico militi bello voluntario (במלחמה מוֹלָה) captam mulierem gentilem vitare: vitiatam vero, quum eam habere uxorem noller, manu emittere, Jur. Nat. & Gent. lib. V. cap. 13. Quod quidem tale est, ut vel meliores gentes ab isto efferatæ libidinis actu tutum præstiterint foemineum secus: ut quod nec armis noceat regulariter, nec in belli culpam veniat. Vide sis quæ huc collegit Grotius de Jure Bell. & Pacis lib. III. cap. 5. §. 19. Easne vero bello captas pudicitiae jacturam facturas existimabimus, quarum saluti & incolumitati ipse Deus consultum ivit: etiam quum nuptis (במלחמה מוֹלָה) bello ipsa Dei lege mandato; ob proprium ipsarum crimen, pereundum esset? Num. XXXI. 17. 18. Numquid sævire in harum corpora fas sit, quas vendere aut servarum loco duriterque habere militem Deus

38 EXAMEN JURIS CANONICI

prohibuit? Deut. XXL. 14. Scio Magistellis quid fraudi sit. Nam ut illud eorum sententiæ præsidium nihil morer, vix mulierculis dignum, quod quærunt in verbis. *Introduces eam in domum tuam, comutae 12.* dixerat Deus, *Sin minus dilexeris eam & dimittes eam sua arbitria; ab nequaquam vendes eam pecunia; ne tyrannidem exerceas in eam compellendo ad serviles operas* (Est enim in Hebræo *וְכָפְרָהּ* quod LXX hic quidem reddidere *ἀνδρά*, sed rectius Deut. XXIV. 7. *velut servit*; mutuata verbi notione a Samaritis, qui *וְכָפְרָהּ* substituere pro *וְכָפְרָהּ* Gen. 1. 28.) *וְכָפְרָהּ* quod illi juxta cum Onkeloso & aliis plerisque interpretibus sic intelligunt. *Eo quod compresfisti eam*; puta pudicitiae violandæ ergo; ceu vero id fas & jus sit militi. Et est (ne quid dissimulem) ubi verbum *וְכָפְרָהּ*, absolute positum, in eum sensum usurpatum legas, quum de muliere sermo est; velut Deut. XXII. 24. 29. Jud. XIX. 24. Ezech. XXII.

10. 11. Sed pace illorum interpre-
tum dixerim, longe aliud dictare le-
gem, de qua nunc sermo nobis est.
Præterquam enim, quod id facile
facti insolentia indignitasque & *analogia*
coarguat, ut diximus; non supine ac
segniter expendendus est istius verbi
usus. Namque flexum in eam for-
mam latissimæ notationis est: dicit-
que in genere actum, quo effici-
mus, ut ægre sit alteri, dum nostro
obtemperat nutui & arbitrio; sive illi
æquabili animo, aut certe lætitia ac
hilaritate carendum sit, Psal. XC. 15.
Thren. III. 33. Levit. XVI. 31. sive
libertate & jure suo, ut vel in servi-
tutem cogatur, Gen. XVI. 13. Exod.
I. 11. alibi, vel vim & injuriam suo
corpori a validiore, Jud. XVI. 5. spe-
ciatim pudicitia inferendam pati ne-
cesse habeat. Atque hoc sensu ac-
ceptum elucidationis ergo sæpe jun-
gitur cum שכב, quod est *concumbere*
cum muliere, Gen. XXXIV. 2. 2.
Sam. XIII. 14. Quum igitur hic sim-
C 4 plici-

40 EXAMEN JURIS CANONICI

pliciter, nec addito verbo illo *לֹא תִּשְׁלַח*,
 Legislator pronunciat *תַּחַת אֲשֶׁר עָנִיתָ*,
 prætereaque de muliere sermo est,
 bello sub militis potestatem redacta;
 quid nisi hoc vult Deus dicere: *Ne
 vendito eam pecunia, neu tyrannidem
 exerceto in eam*, *תַּחַת אֲשֶׁר* propterea quod
 (Vide Jerem. V. 19. coll. cum XVI.
 10.) *male ac duriter habuisti, afflixisti
 eam*, hoc est, fecisti modo ante, ut
 ægre sit ei captivæ, quum tuo ipsi
 agendum vivendumque fuit arbitrio?
 ut apposite Hierosolymitanus inter-
 pres: *עַלֶּה רִשְׁוֹתַי יְהִיבָה דִּי*. *Quod data tibi in
 eam potestas fuerat.* Itaque mandat
 Deus, ut ne gravi in eam miles uta-
 tur supercilio, sed honeste comiter-
 que habeat, quam patria ademta ce-
 terisque mutatae fortis suæ documen-
 tis molestis, de quibus comm. 12: 13.
 satis abunde discruciasset: fore enim
 afflictæ afflictionem additam. Huc
 facit, quod Deus præcipiat, ut miles
 eam dimittat suo arbitrio, cum ducere
 uxorem nolit. Estque parilis ejus
 verbi

verbi usus Gen. XVI. 9. ubi Hagar jubetur Saræ se submittere (וַיִּנָּח) ejusque velut heræ in se potestatem agnoscere. Proin concludamus: non regnum militis Israelitici libidini datum esse in captivas; sævire in earum libertatem & eripere penatibus, justum; pudicitia saltē & multo magis vita, in tuto sint, ut quæ violatæ neque ad violentis securitatem pertineant, neque ad poenam captæ, adeoque non bello magis quam pace impunitæ esse debeant. Sic æquitatem, sic sanctitatem lex spirat, & vacat calumnia.

III. Ex dictis perspicuum est, quod initio monebamus, nullam in raptum proprie dictum legem latam esse Jure Mosaico. Cujus rei si causam lubeat exquirere, forsitan a verò non abluferis, si prorsus eandem adsignaveris, quamobrem & Romani veteres post Solonem, Atheniensium legumlatorem, nihil statuisse legibus Decemviralibus de parricidio, proprie ac

stricte dicto, perhibentur: nimirum,
 quod ad hoc tam atrox, tamque ne-
 farium & execrabile crimen, vix de-
 scensurum civem sua in republica ani-
 mo præsenscerent. Quamquam ii-
 dem nec raptui tum quidem præ-
 fixisse poenam leguntur: puto, ne si-
 bimet infamiæ labem Quirites adper-
 gerent, qui ex violentis conjugis
 cum Sabinis mulieribus prognati es-
 sent. Hinc Sallustius in fragm. lib. IV.
An ignoras Romanos nihil quicquam a
principio nisi raptum habere, domum,
conjuges, agros, imperium? Porro
 Deus inter affines leges ne quidem
 tangit raptum; quia satis erat verbis
 generalibus interdixisse, ne Israelitæ
 Cananæorum Aegyptiorumve, quo-
 rum *caro erat, velit caro asinorum* E-
 zech. XXIII. 19. 20. moribus ac insti-
 tutis viverent: seque iis polluerent,
 quæ Deo abominationi essent, Levit.
 XVIII. 3: Harum vero gentium, si
 non jure & legibus, at consuetudine
 & licentia, rapere saltem innuptam,
 præfer-

præsertim advenam, peregrinam, impune erat; ut apparebit e sequentibus. Deinde, cum ita ferret, ut quid juris sit in casibus specialibus, ipsa lege Mosis non definiatur, (quod nec fieri posse facile omnes largimur) existimandum est horumce casuum decisionem sibi reservasse Deum ~~divinæ legi~~, quoties vel lex exstaret nulla, vel si exstet, verbis generalibus proposita, vel lege perlata poena in delictum non esset constituta. Illius generis exemplum est in causa raptus: istius Num. XXVII. 1-7. hoc locum invenit ibidem cap. XV. 32-36. monetque sacer Historicus poenam ejus, qui violaret Sabbatum, superiorum legum tabulis expressam & declaratam non fuisse, commate 34. Ac proin Deus pro re nata in dubio consulendus, ejusque standum erat sententia. Id quod ergo de raptu similiter tenendum; si quis eo se flagitio obstringeret. Deinde, ut diserta lege raptu Israelitis interdiceretur, nihil necesse

44 EXAMEN JURIS CANONICI

necesse fuit. Ut enim non dicam eos
 Exod. XXXIV. 16. arceri a vicina-
 rum gentium connubiis: tum vero
 etiam per legem Num. XXXVI. de
 non ducenda puella hereditaria extra
 tribum, sic satis cautum esse, ne id
 crimen temere admitteretur; pote-
 rat; quid de eo statuendum sit in ju-
 dicio, nullo negotio per regulam pa-
 ritatis (דון גורא שוה Magistri vocant) ex
 superius allata lege de plagio intelli-
 gimus: nimirum raptum mulieris capitalem
 esse; eoque magis quidem, quo plu-
 ra gravioraque flagitia, vis facta, foe-
 da voluptas, violata in parentes re-
 verentia, in hoc unum, velut senti-
 nam, confluerent. Quin potius a le-
 ge illa plagii, capitis supplicium in
 reum: sanciente, si quis hominem
 Israelitam vel clam dolo abstulisset
 quaestus ex servitio faciundi gratia,
 ad raptum mulieris Israelitidis, qui
 praeter vim factam attentetur cum-
 primis causa voluptatis explendae, fa-
 cile iudex, tanquam a minore ad ma-
 jus

IN CAUSA RAPTUS. CAP. II. 45

jus (קל וחומר) procedere & argumentari poterat. Accedebant ad ultimum præjudicia & exempla, quibus tum ipse Deus, tum sacri Historici, id facinus jam ante abominandum & capitalis noxæ declaraverant; ut mox dicemus.



CAPUT

46 EXAMEN JURIS CANONICI
CAPUT TERTIUM.

EXEMPLA RAPTUUM NUPTIA-
RUMQUE ILLEGITIMARUM ET POE-
NAE IN HAS CONSTITUTAE, E
SACRIS HISTORIIS PETITA;
UNDE CRIMINIS MAGNI-
TUDO ET GRAVITAS
AESTIMETUR.

ARGUMENTUM.

*Locus Gen. VI. 2. exponitur. II. De
raptu Saræ, III. & Dinæ. Quo sen-
su cladem, Sichemitis illatam a fi-
liis, Jacobus culpaverit. IV. Benja-
minitæ rapuere virgines Israelitidas:
jurene, an injuria?*

Huc pertinet, quod Gen. VI. 2.
legitur, atque inter causas re-
fertur terrarum orbis diluvio per-
dendi: ויראו בני האלהים את בגורי האדם כי טובות
Videntes filii
Deorum filias hominum, quod forma præ-
starent corporis, duxerunt ex iis ux-
ores, quascunque delegissent. Filia ho-
minum

minum, Deorum filiis oppositæ, natæ erant, si verum amamus, inferioris conditionis ac fortis hominibus. Suadet Hebræa phrasis; ut cum בני אדם *filiis hominum*, hoc est, humiles, opponuntur בני איש *filiis virorum*, qui sunt viris præstantibus nati. Illi egeni & pauperes; hi locupletes interpretantur exserre Psal. XLIX. 3. *Audite hæc omnes populi; auribus percipite omnes habitatores mundi; tum nati homine (בני אדם) tum nati viro (בני איש) simul dives & egens.* Gemina est Salomonis apostrophe, Prov. VIII. 4. *Filios Deorum* Moses dixit, quos Psaltes *filiis virorum*. Suntque juvenes parentibus editi opibus rerumque affluentia, præsertim dignitate ac generis nobilitate conspicuis: qui cum id essent in civili societate, quod Deus in hoc universo, atque adeo sua opulentia, auctoritate, potentatu, aliquam suprimi Numinis imaginem & simulacrum in terris haberent (quippe *Dei divites sunt, Deos decent opulentia* *Et*

Et factiones. Plaut. Trin. II. 4. 89) hinc אלהים *dii* audiunt, loquendi modo Hebræis trito. Sic tamen, ut tanquam *dii dictitii* opponantur summo & vero Deo, qui discriminis ergo *Deus deorum & dominus dominantium* celebratur, Deut. X. 17. Haud fecus atque Psal. LXXXII. 1. 6. deorum titulo decorantur, qui sedent in cathedra Moſis, vicaria quadam Dei in jure dicundo pollentes potestate: a quibus distinguuntur אדם (*suple בני*) *plebeji & tenues homines*, commate 7. Ac ne cui mirum videatur, ab eodem loquendi genere non abhorreſcere ipſum Moſen, quem nunc exponimus; adeatur is Exod. XXI. 6. XXII. 8. 9. 28. Nec ſcio, an ullo vel Moſis vel reliquorum ſcriptorum ſuffragio vinci poſſit, homines impios, atque a fidelium coetu remotos, ſpeciatim venire אדם בני אדם nomine: & oppoſite quidem ad piorum gregem. Quin contra & horum communem appellationem eſſe, omnes norunt. Eſtque Scriptura non

ιδίας ἐπιλύσεως; sed exponenda ex scripturis, si sapimus. Itaque noster Historicus hoc vult intelligi: *natos nobili genere & opulentos juvenes uxores sibi delegisse hominum, e plebe, deterioris & abjectæ sortis filias*: haud dubie invitatis parentibus & agnatis, si non puellarum, at eorum in quorum illi potestate aut quorum pars erant familiæ. Quanquam & a Cainiticæ profapiæ filiabus, serpentis semine, sibi minus temperasse per idem tempus homines Deo devotos, eoque magis provocasse Dei iram, non negaverim. Secus enim tam feriam id facinus non merebatur censuram. Ac prostant in sacris literis exempla nuptiarum a viris eximie probitatis laude conspicuis ipsoque populo Israelitico initarum cum mulieribus gentilitiis Deoque exosis; quibus tamen sic Deum iratum fuisse atque his antediluvianis, haud facile dixeris. Porro Deorum filii duxere filias hominum maxime ad voluptatem, quod *præstanti essent forma com-*

D

menda-

50 EXAMEN JURIS CANONICI

mendabiles; sive illi alioqui verum Deum colerent atque Sethi essent familia fati, vel hæ aut utrique; sive alteruter conjux sequioris coetus partem faceret. Hæ nubunt ipsis spe fortunarum ampliandarum, atque etiam dignitatis ac nobilitatis, in cujus partem venirent jure matrimonii. Unde his e connubiis qui nascerentur, מבוריג (subaudi חיל, ut est 2 Reg. XV. 20.) *opibus potentes* & אנשי השם *viri famosissimi* evaserant, comm. 4. accedentibus ad promiscuas nuptias נפלים, qui in alios hostiliter irruerant suaque ipsis per vim eripuerant: futuri perditissimis moribus. luxuria, ambitione & avaritia, ceterisque secundis rebus oriri suetis malis, tenuiorum libertati ac fortunis infensi tyrannidemque exercituri; sed suoapte exitio, accitis in supplicium undis diluvialibus. Fere quemadmodum de Cæpione Crispino, Tiberii principis familiari, scriptum reliquit Corn. Tacitus Annal. I. 74. *Potentiam apud unum, odium apud omnes adeptum dedisse exemplum, quod secuti ex pauperibus*

IN CAUSA RAPTUS. CAP. III. 51

ribus divites, ex contemptis metuendi, perniciem aliis ac postremum sibi invenerunt. Nempe, ex sententia Theognidis Megarensis,

τίσται γὰρ πόρος ὕβρις, ὅτ' αἱ πολλὰ ὄλβος ἐπέηται.

Nascitur ex magnis opibus petulantia major.

Ad postremum Moses non ait eos petiisse uxores ab earum parentibus, easve suorummet parentum voluntate & consilio duxisse ex ordine; sed accepisse, quas judicassent habendas: ferarum more in promiscuos concubitus ruentes. *Accepisse* inquit, hoc est, *abduxisse, rapuisse*: quæ est notio verbi ἡρπάζω, cum de muliere sermo est & per vim res geritur; veluti Gen. XII. 12. XX. 2. XXXIV. 2. Conf. Exod. XXI. 14. Job. I. 21. Amos. IX. 2. 3. Ac profecto hoc etiam vitium e societate hominum, in qua bonæ leges languescunt & tanquam aranearum telæ a potentioribus perumpuntur, haud secus atque ex humani corporis sagina extuberare, omnis ævi memoria loquitur. Exemplum vis? Dabit huic

D 2

paris-

parissimum Romanæ Historiæ parens
 T. Livius lib. III. cap. 44-48. de Appio
 Claudio Decemviro, qui Virginii ple-
 beji hominis filiam raptam suæ libidi-
 nis victimam fecerat: scenam apertu-
 rus funestæ tragoediæ patrem miseri-
 cordia in speciem crudelitatis lapsus,
 in filiam sua manu perimendam, ple-
 bem cum milite in Patres conscriptos
 armavit, ut secessione facta mutata-
 que forma regiminis, res omnis Roma-
 norum ad summum periculum adducta
 videretur. Quos quidem mores etiam
 fuorum temporum imagine ad vivum
 depinxit C. Sallustius, Bell. Jugurth.
 cap. 41. *Ita nobilitas, factione magis
 pollens, cum potentia, avaritia sine
 modo modestiaque, invadere, polluere
 & vastare omnia; nihil pensi habere,
 quoad semet ipsa præcipitavit.* Veris-
 simum ergo illud dictum est, si credi-
 mus experientiæ, *Nusquam esse nefas
 in orbe, quod suo exemplo caret.* Quid
 mirum vero, si & in hoc antediluvia-
 norum facinore, de quo sermo nobis
 est

est, observare licet cursum & quasi gradum humanæ perversitatis? Primum illi viderunt filias hominum, deinde cupierunt, ad extremum rapuerunt: neque moribus illarum capti sunt, sed tantum forma corporis. Id quod Deum summopere offendit. Quare, cum alia vitia permulta essent in hominibus, adeo ut condidisse humanum genus Deum poenituerit; tamen hoc unum peccatum promiscuarum nuptiarum, absque parentum consensu initarum atque ad solam voluptatem spectantium, magna emphasi exprimitur.

II. Quod Deus antediluvianorum hominum atro carbone notaverat ingenium, id pravum esse inde a pueritia; hoc vero deinceps, ut primum spiritus resumpserat secundis rebus, non degenerasse in melius Historiæ produnt infecutorum temporum. Discimus enim non innuptas tantum, sed & nuptas masculorum expositas præter suam voluntatem libidini. Quid? ipsumne Dei populum, sanctioribus obstrictum

D 3

legibus

54 EXAMEN JURIS CANONICI

legibus, id ipsum haud exhorruisse flagitium exemplum est in propatulo? Singula ex ordine lustrabimus. Verum & iratum sceleri, ut cum maxime, supremum Numen reverebimur. Primam in his perpetuæ infamiæ notam suo nomini inusit nonnemo Ægyptiorum rex Pharaon: alteram Abimelech, a trita ejus populi compellatione sibi cum successoribus Communi sic nuncupatus, Philistæorum regulus; uterque Saræ, uxoris Abrahami, pudicitiae insidians, quam delusi a marito rapiunt ficto sororis nomine. Hic vero etiam, aut mavis, ejus filius, paternæ ditionis heres factus, in causa fuit, cur & Isaacus, in ejus regionem pedem inferens, ob Rebeckæ formam eximiam suæ saluti metueret: fore enim, ut sese de medio tollere, quam voto mallet excidere potiundæ mulieris. Gen. XII. 12-14. XX. 2. 7. XXVI. 7. Qua quidem ex re satis abunde æstimari potest profligata & incredibilis illarum gentium libido, jusque adeo
viola-

IN CAUSA RAPTUS CAP. III. 55

violatum hospitii, cujus tamen necessitudinis arctum vinculum atque etiam divina reverentia sanctum melioribus gentibus habitum. Qui eorum, & cumprimis proximorum Cananæorum, mores postremo ad id pravitatis grasfati sunt fastigium, ut vel ea de causa illos internecioni devovisse suisque sedibus expulisse Deum sacrae haud obscure prodant historiæ. Ceterum ex his & quod mox adferemus, Sichemi facinore palam est, quamvis innuptam, maxime advenam, peregrinam, rapere & vitiare illorum moribus impune haberetur; tamen viro desponsam violare religioni duxisse. Quippe Pharaon & Abimelech, criminis a Deo postulati, vim factam confestim purgant erroremque & ignorantiam causantur: credidisse enim se Saram Abrahami sororem, necdum virum expertam, quam & ille & ipsa præ se tulisset mulier, Gen. XII. 18. XX. 5. Id quod ex naturalis juris & æquitatis vividissimo sensu, in eorum conscientia superstite, hausisse omnino

cenferi debent: accedente infuper ipfius Dei vindictam interminantis iudicio. Ut adeo legem de raptu non faciendo (in Hebræo eft $\text{לֹא יִרְאוּ} : \text{quod vocabulum etiam hoc fenfu obvium eft Jud. XXI. 23.})$ iis gentibus divinitus latam feptem inter præcepta, mox a diluvio Noachi pofteris data, non abs re prifci Judæorum Magiftri tradiderint. Utut mustei horum difcipuli id præceptum $\text{לֹא יִרְאוּ} \text{ nunc latius extendant ad rapinam quam libet: qualis quidem naturali jure interdifta; neutiquam tamen exfertis verbis vetitam his, qui Noachum proxime ætate attigerunt, illorum temporum perhibet hiftoria. Et vero nuptæ mulieris raptum illum ultimum meruiffe fupplicium, cum ipfi profitentur raptores, tum Deus edicit Philiftæorum Dynaftæ: } *Ecce tu illico moriturus es propter hanc mulierem, quam rapuifti; cum fit marito juncta,* Gen. XX. 3.$

III. Is fuit nuptæ mulieris raptus. Damus aliud innuptæ exemplum,
Gen.

Gen. XXXIV. 1. 2. Et Dinam quidem, Jacobi filiam unicam, non volentem, sed prorsus invitam fuisse raptam compresamque a Sichemo, Hemori filio, ex eo conficitur, quod is, oblato illi vitio, *locutus fuit ad corejus*. Quod nihil est aliud, quam voluisse consolari eam blanditiis. Cui geminum vis virgini factæ levamentum Q. Fabius Pictor in fragmentis Annal. lib. I. de personatō quodam, ut opinor, Martis sacerdote retulit. *Solito institutoque egressa virgo* (Rheam Silviam Vestalem fuisse colligas ex Livii lib. I. cap. 4.) *in usum sacrorum aquam peti- tum ex eo fonte, qui erat in luco Mar- tis subito imbris tonitubrusque, quæ cum illa erant, disjectis, a Marte com- pressa conturbataque, mox recreata consolatione Dei, nomen suum indicantis affirmantisque ex ea natos patre eva- suos*. Ita vero summam Dinæ factam injuriam, jusque adeo naturæ de vi non facienda nec honore virgineo lædendo violatum, ac proinde suo me-

58 EXAMEN JURIS CANONICI

rito poenas dare cum raptorem, tum complices (inter principes enim, ut hic, non foro, sed bello locus erat) non dissimulabant & Jacobus & filii. *Quid enim potest esse sanctum iis, qui etatem imbecillam & praesidio indigentem, libidini suae depopulandam foedandamque substraverint? Non potest haec res pro magnitudine sceleris enarrari.* Verba sunt Lactantii Instit. lib. VI. cap. 23. Sed tempori loquere, ubi Dei timor nullus esset, serviendum ratus prudentissimus fenex, *Perturbastis me, inquit conversus ad filios, qui fecistis, ut foeteam apud incolas regionis hujus, apud Cananeos & Perizzæos; nam cum sim hominibus paucis instructus, si congregaverint se adversus me, cæsuri sunt me, ut exstindar ego & familia mea.* At filii non sacrorum, quæ Sichemus profiteretur, diversitatem indignitatemque caufantur; necum in nuptias consentiunt ex animi sententia; sed quod caput rei erat, respondent: *Num quid velut cum prostibulo*

IN CAUSA RAPTUS. CAP. IH. 19

bulo ageret quisquam cum sarore nostra?
 causam cædis allegantes vim factam a
 Sichemo, & quidem multiplicem;
 nam & domi suæ detinebat Dinam,
 ut liquet ex comm. 26. & per vim stu-
 praverat rapueratque invito parente &
 fratribus. Proin Sichemum suoapte ju-
 mento sibi attraxisse necem: nec ipsum
 tantum, sed & eos, quorum consilio &
 ope id scelus perpetrasset. Qua in re
 ipsius Dei sententiam nuper in casu
 haud multum absimili adversus raptor-
 em & socios dictam, Gen. XII. 17.
 XX. 7. 18. pro se militare, atque etiam
 promissam Abrahamo proavo Dei vin-
 dictam, suis suorumque ab hostibus su-
 mendam Gen. XII. 3. ad sui redundare
 fiduciam, non sinistre judicaverint.
 Unde nihil pensi habuere, quod He-
 mor Dinam a filio stupratam ab Jacobo
 patre & fratribus cunctaque familia,
 quamvis pacis tantum causa, ut vide-
 tur, ex more & ordine petiisset; at-
 que insuper, ut eorum, quos læserat,
 iram mitigaret, illorum moribus sa-
 crisque

crisque sese conformaturum spondisset. Usque adeo ægerrime ferebant vim factam forori suæ ac familiæ, non nisi raptoris & complicum ad unum omnium nece expiandam! Culpat tamen id filiorum, Simeonis & Levi, factum pientissimus parens morti propinquus, Gen. XLIX. 5-7, non quod præter jus & fas illam stragem edidissent; quam eo, quo diximus, sensu ipsiusque Dei sententia suffultam, laudat auctor, qui Judithæ historiam composuit, cap. IX. 2. Sed quod & fidem, Hemoro comm. 15. datam, fefellerissent & se suosque omnes finitimarum profanarumque gentium furori exposuissent: coactum enim se tum solum vertere atque alio transferre lares penatesque. Reprehendit intempestivam filiorum vindictam, quam se inconsulto sumsisent, qui caput esset ac princeps familias; nam si hostili agmine se aggressuri fuissent Cananæi & Perizzæi, futurum se ipsis belli viribus imparem: *paucis quippe hominibus instructum*

structum; fecus vero statuturum; suæ si res salvæ forent. At enim nefarium id Sichemi flagitium vicinis etiam gentibus, quarum hostiles insultus Jacobus metuebat, probe habitum, Deoque vehementer displicuisse, vel hinc liquere puto, quod illi cædis poenas poscere a Jacobi filiis ne auderent quidem. Nam cum sedem Patriarcha ex eorum finibus moveret, Bethalem migraturus; *inerat terror Dei civitatibus, quæ circum erant*, hoc est, sensus ultricis Dei justitiæ, quæ effecerat, ut pavidos & conscientia vecordes intraret metus: quæque injuriam Jacobi filiis inferendam haud inultam sineret; *adeo ut non persequerentur abeuntes filios Jacobi*, Gen. XXXV. 5. En ipsum Deum, effrenem impetum & vim factam Dinæ pudicitiae totique Jacobi familiæ, damnantem in hominum conscientia! En Dei disciplinam, qua vel efferatas gentes coercet, ne in omne ruant nefas suamque sese in perniciem præcipitent, divinæ formi-

62 EXAMEN JURIS CANONICI

formidine poenæ!

IV. At, inquit, Benjaminitæ raptus exemplum edidere tanquam justi, ut videatur, & liciti: eoque magis, quod publica magistratum auctoritate patratum sit, qui ceteris præerant tribubus, Judic. XXI. 25. Verum, ubi rem paulo curatius excutias, deprehendas liquido utrinque non uno modo peccatum esse. Initio enim Seniores Israelitæ prætexunt jurisjurandi religionem, quo filias dare in matrimonium Benjaminitis noluisent; quod tamen dolose ipsi violant: inque raptum consentiunt, flagitium nihilo levius quam perjurium. Nolunt exemplum præbere perjurii, & dant raptus. Neque dolus juramentum solvit, quin adstringat magis. Rursus violant divini legis aliud caput. Nam si puella sit hereditaria; cavetur Num. XXXVI. ne cuiquam alia in tribu nubat, quo prædia non perturbentur. Quid vero, si ex iis raptis aliquæ fuissent hereditariæ? nonne præter legem nupsissent

IN CAUSA RAPTUS. CAP. III. 63

sissent extra tribum? Deinde nec Dei oraculum ante requisiverant, ut factum semper & fieri oportuit in dubio; sed per se ipsos consilium capiunt: quasi in re tam perplexa & ardua errare non possent. Deum, inquam, consulere oportuit priusquam temerario se juramento obstringerent, negarentque se daturus Benjaminitis filias, quas petendi illi jus habebant. Postquam vero id votum ore Seniorum exciderat, præstabat hoc rescindere, quam permittere, ut Benjaminitæ virgines raperent invitis parentibus. Neque enim scio, an vovens homo homini id præripere possit, quod jure ipsi debebat. Debebant autem Israelitæ virgines Benjaminitis: ut propagarent genus suum implerentque naturæ atque ipsius Dei mandatum, Gen. I. 28. Ovidius Fast. III. 195. *Extremis dantur connubia gentibus.* Debebant Israelitæ tanto magis, quod misceri Benjaminitas cum profanis populis ipsa Dei lege nefas erat. Neque hi exciderant jure illo
ob

64 EXAMEN JURIS CANONICI

ob facinus Jud. XIX. ut quod illi bello jam ulti erant plus fatis. Denique ne ambigas ita non jure, sed facto contigisse; repetit sacer Historicus censuræ loco illud intercalare monitum: *Tempore illo non erat rex, aut qui jus diceret cum imperio, in Israele; quisque quod sibi videbatur, faciebat.* Nec est quod contra obtendas, id jure ludorum licuisse solennium, quos ad Tabernaculum Schilunticum Israelitæ edidissent: quomodo Cicero pro Plancio, *Raptam esse mimulam, ait, quod dicitur Atinæ factum a juvene, vetere quodam in scenicos jure, maximeque oppidano;* nisi eadem opera hoc solemne & legitimum dicas, quod sæpe olim factum; quum ex. gr. Consualia pararet Romulus, & Tiberius Circenses ludos constitueret, causa rapiendarum mulierum: sitque etiamnum vel ludis vel alio tempore, prout fors dederit, ubi disciplina est dissolutior. Nam quod fit licentia, morum corruptela, non fit jure. Præterea id factum

IN CAUSA RAPTUS. CAP. III. 65

factum non purgaveris causando, Israelitas non malo animo huc descendisse, sed pia, ut dici solet, intentione: ut ne tribus interiret Benjaminica. Non enim satis est aliquid bono animo fieri; sed videndum apprime est, ut justum, rectum, honestum & consentaneum divinæ voluntati sit, quod agas. Adhæc & naturali jure & consuetudine retro a majoribus accepta quasi lex tum viguit, quæ caverat, ne matrimonia citra parentum consensum sint rata; hic vero rapiuntur puellæ ac matrimonia ineuntur, non solum insciis, sed & invitis parentibus & agnatis; veluti apparet ex comm. 22. ubi, *Quum venerint*, Seniores inquirunt Benjaminitis, *parentes puellarum aut agnati earum ad litigandum apud nos* (melior lectio in Hebræo habet *אֵלֶיךָ* *ad multiplicandum sese*; ut sit tumultuante ac seditionibus æstuante populo) quos enim in jus vocarent, ubi salva non erat a Senioribus ad superio-

E

perio-

66 EXAMEN JURIS CANONICI
perio rem judicem provocatio?) *dice-*
mus eis: Gratificamini nobis illas,
(observa hic potestatem illorum tem-
porum moribus inductam, parenti-
bus & ubi illi desint, agnatis inte-
gram, vindicandi jura filiarum &
agnatarum; sed & matrimonium illis
invitis contrahi nefas fuisse :) *qui non*
cepimus cuique uxorem suam in isto bel-
lo, puta, quum Jabes expugnaremus
oppidum Gileatididis, quandoquidem
vos eas vestra sponte non deavistis illis.
Jam ergo vestra culpa erit. Quod
decretum eo unice confarcinatum at-
que excogitatum esse quis non videt,
ut & juramenti scrupulum, si fieri
possit, parentibus eximerent, & rap-
tus culpam, dicis causa, in parentes
rapiendarum virginum rejicerent? E
diverso Benjaminitæ peccarunt eo
quod virgines non ex ordine singuli
peterent a parentibus Schilrentinis;
sed dolose atque ex compacto & co-
muni fraude cum Senioribus, consti-
tutis in eam rem ludis & spectaculis,
ut

IN CAUSA RAPTUS. CAP. III. 67

ut dictum est, per vim abducerent, eoque raptus se reos facerent. Neque vero magistratibus jus competit in elocandos civium liberos; nec ut compellant parentes; nisi forte eo casu, quo illi in liberos sunt injurii, vel quum negaverint filias legitime postulas dare finitimis, quibus negare eas, ut superius visum, nefas erat; quorum neutrum hac in quaestione dici potest. Audiamus Patrum gravissimum, Augustinum, contra Romanos disputantem, de Civit. Dei II. 17. *Ex hoc jure ac bono credo raptas esse Sabinas. Quid enim justius & melius, quam filias alienas, fraude spectaculi inductas, non a parentibus accipi, sed vi, ut quisque poterat, auferri? ^{Kal' eiq'vitas} dictum. Nam si inique Sabini facerent negare postulas, quanto fuit iniquius rapere non datas? Justius autem bellum cum ea gente geri potuit, quæ filias suas ad matrimonium conregionalibus & consinalibus suis negasset petitas, quam cum ea, quæ repetebat*

E 2 ablatas.

68 EXAMEN JURIS CANONICI

ablatus. Habes ergo, Lector, luculentum exemplum raptus proprie dicti, adversus innuptas consummati, atque per apertam & publicam vim, consutis dolis, invitis renitentibusque parentibus facti. Qualis si in civitate illa bene constituta inter privatos attentatus fuerat, haud dubie capitalis sit; adeo quidem, ut per jus Mosaicum lege plagii Deut. XXIV. 7. raptarum parentibus agendi in judicio adversus delinquentes jus salvum fuerit; ut supra cap. II. §. 3. dictum.



CAPUT

IN CAUSA RAPTUS. CAP. IV. 69

CAPUT QUARTUM.

IN RAPTUM CONCILIORUM
CANONES.

ARGUMENTUM.

Canones Conciliorum, Ancyрани, Challengedonensis, Cabilonensis. II. Meldensis & Aquisgranensis. III. Quæ ratio diversitatis eorum a Jure Civili. IV. A vetustis ac melioris notæ canonibus recessum est in Papatu, & quibus de errorum principiis. Concilium Aurelianense & Capitulatio Caroli Magni. V. Decretum concilii Tridentini excussum. VI. Epilogus.

Jus divinum excipiat Ecclesiasticum:
ex illo manans, velut radii e sole.
Sic tamen, ut labente ævo mirum
in modum sit adulteratum errorum-
que nebulis pœne extinctum. Cujus
rei parva in imagine exemplum ob
oculos ponam; si quid vetus Eccle-
sia, quid Papatus hac in causa decre-
verit, ex ordine retulero. Prima cir-

70 EXAMEN JURIS CANONICI

ca raptas virgines desponsas legem condidit Synodus Ancyrana I Galatiæ. habita, A. C. CCCXIV. Canone XI. τὰς μνηστεύσας κόρας, καὶ μετὰ ταῦτα ὑπὸ ἄλλων ἀρπαγείσας, ἴδοξεν ἀποδώσθαι, τοῖς προμνηστευσαμένοις, ἢ καὶ βίαν ὑπ' αὐτῶν πάσθαι. Justello interprete : *Desponsatas puellas, & ab aliis postea raptas, placuit iis reddi quibus ante desponsatae fuerant, etiam si vim ab illis, scilicet raptoribus, passa sunt. Quæ sic accipiunt & interpolant Canonistæ C. 27. q. 2. Si puella rapta sit alteri desponsa per verba de futuro, reddendam esse illi, modo eam velit recipere. Sin vero nolit, puellæ, quæ rapta fuit, liberum esse alii nubere. Verum si desponsa fuerit per verba de præsentī, & probari queat invitam fuisse raptam, sponsum, si nolit eam recipere, oportere cogi. Quam tamen poena in ipsos raptores hoc canone sancita non esset; inde vero recte Basiliius canone XXX. qui est adversus raptores, in epistolis ad Amphiloχium, observavit, Usque eo nullum*

IN CAUSA RAPTUS. CAP. IV. 71

*nullum reperiri antiquum canonem, qui
 id genus homines respiciat; additque, Sed
 se existimare, eos per tres annos poeniten-
 tiæ subjiciendos esse, una cum iis, qui
 ipsorum facinoris conscii sunt. Ex quo
 factum est, ut Concilium Chalce-
 donense, Oecumenicum, coactum
 A. CCCCLI. in ipsos raptores censu-
 ram strinxerit, canone XXVIII. τὸς
 ἁγιοτάτους πατέρας τῆς ἐκκλησίας οὐνοεκότας, ἐκσυγκλη-
 τήτους δὲ κυριότατους τοῦ ἀπράγματος, ἁγίων ἑ ἀγίων
 ἐκκλησίας, ἐκ μέρους ἀποστόλων ἑκείνων, ἐκκλησίαν τῆς ἰδίας (alii
 codices iuniorum) πατρῶς, ἐκ δὲ διὰ τῶν ἐκκλησιαστικῶν.
 Eos, qui rapiunt mulieres, vel auxi-
 lium præstant, aut consentiunt iis qui
 rapiunt, definit sancta Synodus, siqui-
 dem clerici fuerint, proprio gradu ex-
 cidere: sin autem laici, anathemati-
 zari. Quum enim, ut opinor, cre-
 scente hoc delicto, moribus Vanda-
 lorum Gothorumque barbararum
 gentium, rapinis infamium, in Ro-
 manum imperium velut undæ irrum-
 pentium, sed mox armis reprimen-
 darum, Imperator Justinianus ante*

paullum specialem legem raptui opponeret, quæ extat in Codice, de Raptu virginum (Neque vero antiquis moribus poena in raptos fuit definita lege illa Romanorum, lata, ut videtur, demum post facinus ab Appio Claudio admissum, de quo Livius, *Vim ingenuæ virgini inferre, aut eam suasionem in tuam sententiam trahere caveto.*) iidemque delinquentes turbatæ offensæque societatis Ecclesiasticæ rei viderentur, suarum non minus partium esse Patres in eo concilio existimarunt hosdem suæ disciplinæ subicere. Neque raptos tantum impetunt, verum & eorum socios. Ut plane diceret normæ loco ipsis fuisse Justinianum Codicem, quem diximus. Sanctio tamen canonis haud paulo gravius premit laicos, quam hos, qui sunt de clero. Quod quidem quo illorum jure fiat, fateor me non intelligere. Utrouque enim scandalum datur Ecclesiæ. Ex quo apparet utrosque fuisse ex æquo ab
ejus

IN CAUSA RAPTUS. CAP. IV. 73

ejus Communionem removendos: neque adeo illos magis quam hos feriendos anathemate. Quare viderint Patres illi, num quo privilegio vel Ecclesiæ constitutio atque indoles, vel Christus & Apostoli (si quidem recedamus ab illo 1 Tim. V. 19. quod agendi adversus eos modum spectat.) donarint sacrorum ministros in his atque id genus aliis delictis: quæ efficiunt, ut Dei ira provocetur, utque hætenus instituto ac fine suo coetus excidat fidelium. Quin imo nocent, qui sacris præfunt, malis exemplis tanto vehementius, quanto illi a populo majores habentur. Sane vero olim indecoras nuptias Sacerdotibus prohibitas, & in horum filiis fornicantes gravius animadversum, quam in plebejas, discimus ex Levit. XXI. Adeo & morum pravitatem infamiamque sacrorum hominum ordine procul exulare Deus voluit. Raptor ergo censuram subit secundum hoc concilium: neque is tantum,

verum & qui *auxilium præstat*, & qui *consentit*: ille ipso opere & facto, hic verbis & suasionem; nam, ut ait Comicus, *qui monet, quasi adjuvat*. Est autem excommunicatio novissimus disciplinæ gradus in foro Ecclesiæ. Neque enim hæc procedit ultra; tametsi capitis supplicium lex civilis Justinianeæ fontibus infligit. Et sic tamen sat graviter in fontes animadversum fuit, pro ratione illorum temporum. Nam constricti anathematis compedibus excludebantur communione Ecclesiæ: nec aliquid eorum ad ipsos pertinuit, quæ membris Ecclesiæ a sacrorum ministris præstabantur; veluti benedictio sacerdotalis, his data qui matrimonium inituri erant. Eoque ipso matrimonium inter raptorem & raptam illegitimum censebatur. Quanquam de praxi antiquæ Ecclesiæ hac in re vix constat. Videtur tamen raptor actum ad aliquot annos, ab Episcopo definiendus, poenitentia ad Ecclesiam recep-

IN CAUSA RAPTUS. CAP. VI. 75

receptus esse : quod volunt canones, a Basilio & post Chalcedonenses editi. Huic Concilio accedit, idque confirmat Cabilonense II. habitum in Gallia A. 1534.

II. Et hi quidem circa eam causam tum in Ecclesia vigeant Canones. Resultabat vero ex hoc disciplinæ capite, quatenus ad forum sacrum pertinebat, non unus casus, non una quæstio superioribus Conciliis haud definita. Quod cum perspicerent sacrorum præsules, transactum fuit in Concilio Meldensi I. ejusdem Galliæ, A. 1535. Canone XXI. *ut raptor & rapta poenitentiam publicam agerent.* Deinde conceditur matrimonium, non tamen inter se, verum cum aliis. Additurque, *Si conjux alterius moriatur, ne is qui raptum admisit, vel raptori consensit, postea unquam ineat novum matrimonium, nisi Episcopus relaxet.* Adhæc decernitur, Nullo modo placere, ut tale conjugium coeat, ne si parentes quidem consensu-

76. EXAMEN JURIS CANONICI

SENSERINT. Prohibentur ergo nuptiæ raptoris cum rapta, *si vel parentes consentiant*, Quo ipso canon imitatur legem civilem Codicis. Atque hoc idem statutum in Concilio Aquisgranensi I. convocato a Carolo Magno, A. 1000. CCLXXXIX.

III. Quum vero lex Codicis Justinianeï mortis poenam fanciat in raptorem; miraberis, Lector, quî fiat, ut canones, quos modo attulimus, sic decernant de poena raptoris, tanquam si de vita securus pro membro Ecclesiæ sit recipiendus; modo ejus censuram subeat. Qua in re videtur affirmandum: vel duriores vias esse Patribus poenam capitis in foro civili receptam; quemadmodum & olim & nunc etiam non eadem statuitur moribus gentium, in quibus alioqui viget Jus Imperiale. Vid DD. ad sæpe citatam legem Codicis, & l. Julianam de vi publica: vel certe existimandum, legem Justinianeam in his regionibus, ubi habita concilia, non obti-

IN CAUSA RAPTUS. CAP. IV. 77

obtinuisse; vel sic censuisse canonum conditores, raptorem scilicet teneri censura Ecclesiæ, etiamsi capitis non effugeret supplicium: quo pertinet canon Concilii Chalcedonensis.

IV. Ad extremum sacræ hujus disciplinæ non una corruptela in Papatum invec̃ta est; & quidẽ ex triplici errore, qui tum invaluit: Primum, quod matrimonium in sacramentorum duceretur numero: Deinde quod Ecclesia *αὐθιγὰς* præstare crederetur his, qui ob delictum aliquod a civili magistratu plectendi erant: tum, quod fori denique civilis jura quædam Ecclesiæ juribus affinia, ad Ecclesiam pertinere putarentur. Ex quo accidit, ut matrimonium raptoris cum rapta licitum pronunciaretur, & raptor si ad Ecclesiam se recipiat, poenam mortis evitaret; velut decrevit Concilium Aurelianense III. cui suffragatur Capitulatio Caroli M. de Partibus Saxonix §. XI. *Si quis filiam domini sui rapuerit, morte moriatur.*

78 EXAMEN JURIS CANONICI

tur. Et sequitur §. XIII. Si quis vero pro his mortalibus criminibus latenter commissis sponte ad sacerdotem confugerit, & confessione data agere poenitentiam voluerit, testimonium Sacerdotis de morte excuset. Quæ quidem qualia, & quam insincera sint, dudum disputarunt alii. Hinc tamen, sicut error errorem ferit, Canonistæ, præcuntibus Decretalibus, licere ajunt raptori matrimonium inire cum rapta. Cumque Concilia supra dicta in diversum abeant, respondent, hoc velle Concilia: non licere matrimonium contrahere illo casu, nisi publica poenitentia præcesferit & consensus parentum; secus nihil prohibere. Quod quam recte habeat & quousque verum sit, apparet e verbis Meldensis Concilii, quæ ante retulimus. Gratianus tamen in eam sententiam citat Hieronymum, qui videatur agnoscere tria genera matrimoniorum licita: unum, cum puella traditur a parentibus aut tutoribus viro

IN CAUSA RAPTUS. CAP. IV. 79

viro in matrimonium : alterum , si puella oppressa fuerit a viro, & pater deinde consentiat, ut ei locetur in matrimonium : tertium , si pater in ejusmodi nuptias non consentiat, sed eam alteri viro tradat. Ex quo colligit Gratianus (mirum dictu!) Hieronymum probare matrimonium inter raptorem & raptam. At vide, quæ in has leges Mosaicas supra cap. II. disputavimus. Nec multum ab his diversa scribit Thomas Aquinas cum reliquo Scholasticorum grege. Statuit ille, raptum non impedire contractum matrimonium. Canonibus autem qui contra stant, respondet, illos fuisse latos ad criminis detestationem ; sed Papam Innocentium deinde rem melius considerasse : puta Extra. cap. 3. de Raptoribus & Incendiariis sic decernentem : *Si puella invita rapta fuerit, & postea consentiat matrimonio raptoris ; nuptiæ contractæ sunt etiam invitis parentibus.* Ac subjicit ibidem, *hoc fieri in honorem ma-*
trimo-

80 EXAMEN JURIS CANONICI

trimonii; cum contra aperte ad ejus contumeliam pertineat, si quis rem totam propius consideret. Et vero tantum abest, ut invitis parentibus matrimonium raptori cum rapta concedant antiqui canones, ut illud prohibeant potius, si vel parentes consenserint: legis civilis normam secuti, quæ raptoribus poenam constituit; etiamsi parentes postea consentiant matrimonio. Taceo Exod. XXII. 17. parentibus potestatem dari vel confirmandi vel rescindendi matrimonii filiae corruptæ, & Num. XXX. 4. 5. tollendi votum a filia nuncupatum. Unde evidens est, idem iis jus salvum fuisse etiam in aliis, maxime in honestis liberorum matrimoniis: confirmante praxin Patriarcharum & secutorum temporum historia. Adeone autem Papa ex vero statuit, consensum parentum ad matrimonium non esse necessarium? clandestina matrimonia, contra parentum consensum contracta, esse rata & vera matrimo-
nia,

nia, quamdiu Ecclesia ea irrita non fecerit? atque id genus alia, quæ vel gentes exhorrescerent; ut est apud Cujacium Observ. III. 5. Quanto magis pie Canon XLII. Basilio servatus in Epistolis ad Amphilochem declarat, *matrimonia eorum omnium, qui in alterius mancipio sunt, contracta absque illorum assensu, non esse matrimonia, sed fornicationes: atque adeo matrimonia liberorum sine consensu parentum nulla esse?* Exam. Jur. Canon. Cap. IV. §. 4. Ut nesciam equidem, an Christiana in Ecclesia atque inter meliores gentes antehac auditum fuerit illud Priapeium carmen, quod JCtis quibusdam in ore est: *Ik laet myn haenen uyt; elk verwaer zyn hennen.*

V. Sed illam errorum illuviem, vetustis ac melioris notæ canonibus interpolatam, in unum, quasi in sentinam, coëgit Concilium Tridentinum, Sessione XXIV. Decret. de Reform. Matrimonii cap. 6. *Quamdiu rapta mulier in potestate raptoris fuerit, nullum pos-*

F

se

se fieri matrimonium decernit sancta Synodus. Si autem in libertate constituta, eum in virum habere (Latine vero, amabo vos, non barbare! ô sancti Patres!) consenserit, eam raptor in uxorem habeat: Jure tamen ipso sint excommunicati, perpetuo infames, & omnium dignitatum incapaces, tam raptor, quam omnes consilium, auxilium & favorem illi præbentes. Si clerici sint, de gradu suo cadant. Dotare autem raptam arbitrio judicis raptor teneatur, sive illam duxerit, sive non duxerit. Age vero, fricemus paulisper hanc aristam! Quum Synodus raptos & complices excommunicatione ferit; in eo sequitur presse confirmatque Patrum Chalcedonensium sententiam. Et mirito quidem; nisi quod Clericos ὁμοφύλους paulo habeat mitius, quam jus & fas finit; ut supra dictum. Veruntamen deserit sanio-rem canonem Meldensis Synodi, quum irritum matrimonium raptoris cum rapta non decernit, nisi rapta in libertate constituta

tuta nolit raptori nubere. Deinde recedit a Jure Civili, quod tamen antiquis Conciliis fere pro norma fuit, poenam statuente in raptorem, si vel mulier in matrimonium consentiat. Nimirum ita recens philosophati erant Canonistæ C. 36. q. 2. *Si puella, inquit, consenserit raptori, primum auferetur ab eo, & parentibus restituetur; sed excusata, id est, cautione accepta, ne occidatur vel exheredetur.* Et Theologorum illa tum fuit regula, arrepta e vetere Romanorum schola, ut colligere est e Corn. Tacito de Orat. cap. 35. *Rapta raptoris mortem vel nuptias optet.* Sed heus! Patres, vestram fidem! Hoccine est parentum honori & consensui præscribere? pessimi rem exempli, pientissimis legibus ante proscriptam Deoque exosam, mimico ambagium delectu quasi postliminio in Ecclesiam reducere? Facilene inducetur rapta, ut consentiat matrimonio? Nonne honori & pudicitiae consulat, ubi jam raptor per vim ma-

trimonium cum ea contraxit, torique secuta est copula? Tanti erat poenam, aliis terrori ac freno libidinis futuram, minuere, & raptorem quasi adjuvare, quo potiatur Helena, cui tanto nisu scelestus inhiaverat? Tanti erat pulverem scholasticum publico suffragio cohonestare? Dico scholasticum, nec tamen eruditum pulverem. Nam cum ad finem properare, & mox obsignare Concilii acta e re esset Pontificis, sui non habentis fiduciam, reliqua ejus decreta a Sessione XXIV. quam diximus, velut ex arena perficienda Theologis data sunt; testibus qui illius composuere historiam. Rursus, qua fronte conceditur illinc matrimonium raptori cum rapta, hinc intra gradus prohibitos contractum dirimitur eadem sessione, quorum quidam nullo modo fundantur in lege Divina? Quasi vero raptus Divino jure non æque, imo magis sit abominabilis; ut supra demonstratum. Idemque sentiendum de matrimonio, a Clericis ante solenne votum inito,

inito, quod sacrilege rescindit Can. IX. de Sacram. Matrim. Quid? quanto satius fuerat separare raptorem a rapta, quam divellere a se mutuo eos, qui stuprum admiserant? siquidem id non sit conjugium, nec legitime conjugii initium esse possit; ut est apud Basilium Canone XXVI. Sunt autem decisiones illæ Basilii circa præcipua Disciplinæ capita spectandæ, non ut peculiare ejus sententiæ, sed tanquam leges Ecclesiæ suis temporibus usitatæ. Omitto cetera, quæ excusare scriptores Protestantés, qui ei Concilio larvam detraxere. Porro ne videantur *ἀλλοι γενομένοις* ac sine numine sic statuere, decretum mununt etiam hac poena: *Dotare raptam arbitrio judicis raptor teneatur, sive illam duxerit, sive non duxerit.* Scilicet quum vetusti canones raptorem ferirent anathemate; id sic acceperant limitaverantque: antehac Canonum doctores, *nisi velit poenitentiam agere: quam si agat, multam pecuniariam imponi.* In eoque ajunt se verbum Dei

F 3

sequi,

86 EXAMEN JURIS CANONICI
 sequi, quod est Deut. XXII. 28. *Si quis puellam vitiarit, dabit patri ejus L. siclos, & eam ducet uxorem.* Atque ita condemnant raptorem ad certam pecuniæ summam patri puellæ solvendam : quam si nolit solvere, aut non habeat unde solvat, compellitur ad serviendum patri puellæ per aliquot annos, quos Glosa contrahit ad quinque, hac lege, ut interim se possit redimere, si velit. Verum dicto loco non de raptu, sed de stupro violento sermonem Mosi esse, supra confecimus. Hanc tamen *μεισείας* & *ἀβλεψίας* mentisque hebetudinem, pro eo quod agnoscere Theologos illos oportuit, novo potius errorem e trivio suffulciunt tibicine. Putares in eudendo hoc canone habuisse ob oculos legem civilem, quæ raptæ addicit bona raptoris; siquidem & in aliis, ut æquum erat, leges imitati essent. Verissima proinde est de hoc genere hominum Ludovici Vis sententia, in lib. III: cap. 10. Augustini de Civitate Dei. Sed ob hoc a talibus

pis

pis tenebrionibus foras egesta & expurgata: *Felices architecti, quorum structura ad coelum usque erecte elegantissima & firmissima videtur, cujus est fumus pro fundamento! Ex similibus initiis maxima pars eorum, quæ Philosophi & Theologi in scholis nugantur, est orta.* Ad ultimum vero etiam foro civili præscribunt personati Amphictyones: primum, cum poenam capitis jure civili in raptorem constitutam suspendunt, concedendo matrimonium: deinde, quum raptores & socios perpetuo infames & omnium dignitatum incapaces pronunciant, jubentque ut raptor dotet raptam arbitrio judicis, puta Ecclesiastici; neque enim aliud velle videntur. Quæ illuc aurigantur, ut seculari judicio subtrahatur & hujus causæ cognitio. Quod & perspexerat reprehenderatque Regis Galliæ legatus, qui Concilio interfuit.

VI. Adhuc de violenti connubii genere atque ejus censura dictum. Quæ cum ita sint: cum & divino & huma-

no gentiumque jure id factum habeatur detestabile; dici non potest, quam sit contumeliosum Christiano nomini, si quidem hæ nuptiæ legibus Ecclesiasticis, si publica magistratuum auctoritate permittantur; nec solum illæ, verum & quæ ad eas accedunt proxime. *Quid irreligiosius? quid audacius? quid ipsa sceleris confidentia tutius?* ut est apud Minucium Felicem, declamantem in idem facinus ab Romanis Sabinorum mulieribus intentatum perpetratumque. Habuit profecto raptus, habuere matrimonia cum injuria parentum conjuncta semper infaustum exitum; sive sacras lustremus historias sive profanas. Provocavit raptus divini numinis iram & in fontes supplicium: excitavit dissidia & bella rerumque publicarum & regnorum everisiones. Jo Argus abducta est a Phœnicibus, Europa a Cretensibus, Medea ab Jasone, Helena a Paride, si constanti veterum traditioni credimus. Quumque Sabino-
rum virgines per vim Romani abdu-
xissent;

xisent; funestum bellum consecutum est, quo uterque populus fere concidit. Esavus vero etiam, constituta sibi inconsultis parentibus familia, cum omni posteritate Dei communione & populo exclusus, triste petulantiae experimentum dedit. Quare, cum Deus noluerit hæc scelera impunita, quid justius? quid magis e magistratum officio, quam declaratam ipso opere atque ipsis sacrarum literarum monumentis Dei voluntatem & sententiam executioni dare? *Tollite improbum ex vobis*, præcipit Apostolus 1. Cor. V. 13. Non est hominum connivere in his quæ Dei jure sunt constituta. Conveniret ergo etiam in foro Ecclesiæ talia matrimonia, aliaque cum hostilitate quadam & injuriæ parentum conjuncta, posthac evitare. Augustini gravissima sententia est, cum loquitur de raptu Sabinarum, quas diximus, de Civit. III. 13. *Talibus nuptiis populum Romanum non Venus, sed Bellona dotavit, aut fortassis Aleæ illa infernalis furia:*

Quæ sciat unanimes armare in prælia fratres,

Atque odiis versare domos.

Scio proflare passim bonas leges, quæ vetant abusus matrimonii: clandestina etiam sponsalia. Nec ignoro multa in hominum societate doleri magis quam tolli posse. At videadum tamen, ne jure nobis exprobetur, quod olim Plautus e Scena Romano ingessit populo, Trin. IV. 3. 30.

Mores leges perduxerunt jam in potestatem suam:

Eæ miserae etiam ad parietem sunt fixæ clavis ferreis,

Ubi malos mores affigi nimio fuerat æquius.

Præclarum illud Valerii dictum est, omnis ævi memoria & exemplis confirmatum, IV. 3. 1. *Ii demum penates, ea civitas, id regnum æterno in gradu facile steterit, ubi minimum virium Veneris pecuniæque cupido sibi vindicaverit. Nam quo istæ generis humani certissimæ pestes penetraverint, ibi injuria domi-*

dominatur, infamia flagrat. Non sum in ea sententia, ut matrimonia, quæ usque huc eo modo contracta sunt, negem esse matrimonia. Neque enim animus est confusionem rerum inducere. Sed hæc duo affirmo; cum Petro Martyre in Judic. cap. ult. primum in contrahendo peccatum esse; præsertim si hoc factum sit invitis parentibus. Deinde, leges illas, quibus hujusmodi matrimonia conceduntur in Imperio, esse corrigendas, ut ne posthac id facere liceat. Videmus enim ordinem a Deo positum perverti: quum non tantum parentes, quorum consilio matrimonia contrahenda sunt, habeantur contemptui; sed & hac via juvenes ad effrenem licentiam animentur, cum sperent se posse raptas aut illectas uxores ducere. Cumprimis hoc in votis est merito bonis omnibus, qui Ecclesiæ partem faciunt Protestantium, ut affulgeat olim ille dies, quo & hoc mysterii iniquitatis *λείψανος* facescat ex illorum Consistoriis, a fermento Papi-
stico

92 EXAMEN JURIS CANONICI.

istico sic satis repurgatis: jusque adeo omne ad sanctiora principia, ad sacram Scripturarum veterisque Ecclesiæ ac naturæ juris obrusam & legum civilium concordiam exigatur. Quippe *lex in tantum habet vim legis, in quantum participat rationem justitiæ*; ut Augustinus. Quid autem justum sit, ex Dei voluntate atque hominum consensu aut ubi opus est, e natura atque indole societatis, in qua juris aliquid statuitur, cognosci oportet.

I N D E X.

B.

Bafilii de canonibus quid tenendum. Cap. IV. §. 5. p. 85.

Bello captam mulierem vitare an licuit Hebræo militi? II. 2. p. 37-41.

Benjaminitæ rapuere virgines: jurene, an injuria? III. 4. p. 62.

בני אדם & בני אלהים quinam. III. 1. p. 46.

C.

Canones Conciliorum veterum adversus raptos. IV. 1. 2. 4. 5. p. 70. 71. 75. 76. 81. 82. 85. Leges civiles imitati sunt. Ibid. §. 1. p. 72. a quibus tamen differunt ratione poenæ in raptos constitutæ. Ibid. §. 3. p. 76. 77. Ab antiquis his canonibus recessum est in Papatu, & quibus de causis. IV. 4. p. 77.

Canonistarum error de lege Deut. XXII. 28. 29. II. 1. p. 33. IV. 5. p. 86.

Clerici raptos, an jure benignius habendi, quam Laici. IV. 1. p. 73. 74.

D.

Dina rapta a Sichemo. III. 3. p. 57.

F.

Filiæ a parentibus procreantur ad legitimas nuptias, non ad raptum. I. 5. p. 20.

G.

Gratianus nequicquam pro se citat Hieronymum,

I N D E X.

mum, ceu vero probaret matrimonium raptoris cum rapta. IV. 4. p. 78.

H.

Hebræorum verborum נשף & נפח notiones evolvuntur. II. 2. III. 1. p. 38. 51.

I.

Innocentii Papæ decretum de nuptiis legitimis raptoris cum rapta, si vel invitis parentibus contractæ sint, ad Divini & Gentium juris regulam exigitur IV. 4. p. 79. 80.

Juris Canonici fata in scholis Protestantium.

I. 1. p. 9. 10. 11.

Justinianus qua occasione legem in raptores tulit. IV. 1. p. 71. 72.

L.

Leges decemvirales nihil statuerunt de raptu, & quamobrem? II. 3. p. 41. 42.

M.

Matrimonia absque consensu parentum contracta, non sunt matrimonia, sed fornicationes. IV. 4. p. 81. Matrimonium raptoris cum rapta illegitimum decernunt antiqui Canones IV. 1. p. 74. 2. p. 75. ne si parentes quidem consenserint. Ibid. 2. p. 75. 76.

Moralis actionis vitiositas qua ex re æstimanda. I. 5. p. 19.

P.

Parentum & cognatorum consensus accedit ad nuptias filiarum & cognatarum. III. 4.

p. 66.

I N D E X.

p. 66. Parentum potestas in filias, jure veterum Hebræorum & Christianorum. IV.

4. p. 65. 66.

De Plagio lex Divina. II. 1. p. 31.

Protestantium juris sacri principium duplex.

I. 7. p. 29.

Puellæ nuptias inituræ quid magnopere curandum, Plautina docuit Alcumena. I. 5.

p. 21.

R.

Rabbini datum Noachi posteris interdictum de h^u latius extendunt, quam par erat.

III. 2. p. 56. Illorum errores de sensu legum Deut. XXII. 28. 29. & XXI. 10-14.

II. 1. 2. p. 33. 37. 38.

Raptoribus per Canones Conciliorum veterum poenitentia ab Episcopo imposita ad aliquot annos. IV. 1. 2. p. 71. 75.

Raptus quid in genere. I. 2. p. 13. 14. Gratiani inepta definitio. Ibid. 3. p. 14. Plenius describitur. 4. p. 16. 17. 18. Dolis & blanditiis expugnare puellam minorem, quid distet a raptu veri nominis. 5. p. 19. Incommoda e violentis conjugii in ipsam Rempublicam redundant. Ib. p. 21. In raptum proprie dictum lex Mosæica lata est nulla. II. 1. p. 32. & quare? II. 3. p. 42. Quid tamen juris statuendum, facile liquebat judici Israelitico. Ibid. p. 43. In
raptores

I N D E X.

raptōres mulieris desponsatæ & complices
ultimum Deus sancivit supplicium. III. 2.
p. 56. Canones Conciliorum in raptum.
IV. 1. 2. 4. 5. p. 70. 71. 75. 77. 81. Rap-
tum infausti exitus. IV. 6. p. 88. 89.

S.

Scripturæ Sacræ loci exponuntur & illustran-
tur. Gen. IV. 2. Cap. III. §. 1. p. 46.
Gen. XII. 12-14. p. 51. XX. 2. 7. p. 51.
XXVI. 7. Ibid. §. 2. p. 51. Gen. XXXIV.
1. 2. p. 57. Gen. XLIX. 5-7. Ibid. §. 3.
Exod. XXII. 16. 17. Cap. II. §. 1. p. 32.
Deut. XXII. 28. 29. Ibid. p. 33. Deut.
XXIV. 7. Ibid. p. 31. Jud. XXI. 23. Cap.
III. §. 4. p. 62.

Seldenus reprehenditur. II. 2. p. 36.

De Stupro voluntario & violento leges Di-
vinæ. II. 1. p. 32.

T.

Tridentini Concilii decretum in raptōres ad
examen revocatur. IV. p. 82. 83. seq.

V.

Vives (Ludovici) sententia de Theologis &
Philosophis sui temporis. IV. 5. p. 87.





